

Ayera Allan Howell a retira for di AVP y como Consehero di Minister Mike de Meza

E no ta haya cu el a haya un trato husto di AVP



FOR di basta dia caba, tabata circula informacion cu e candidato riba lista di AVP, Allan Howell a dicidi di retira for di e partido, pero na mes momento a entrega su retiro como coordinador di Minister Mike de Meza.

El a cuminsa na bisa cu como ser humano bo tin tene cuenta cu semper kere den propio dignidad, semper sa cu bo bida tin un balor y semper kere den bo mes. Y como hende, bo mester tin honor y balor hopi alto pa ta un persona ehemplar den comunidad.

Allan Howell ta sinti cu el a tuma e decision aki, ora cu el a wordo aserca na 2012 pa lider di AVP, Mike Eman pa subi lista di AVP. Despues di a consulta cu su bario y su famia, el a dicidi di subi lista di AVP, cu e meta pa haci e diferencia.

Pero e no a logra su meta, maske cu el a haya mas di 422 voto como nr. 27.

Su deseo tabata cu e kier a drenta Parlamento, si mira cu e tin mas voto cu varios Parlamentario di AVP awe den Parlamento.

Allan Howell pesey e por sosten e pensamiento di Dangui Oduber, kende kier trece cambio den Kiesreglement, unda e candidatonan cu haya mas voto, t'e promenan yama pa drenta Parlamento y no manera e ta awor, segun secuencia.

Pesey Allan Howell ta kere cu e merece mihor, pero el a demostra kico e por haci, trahando pa comunidad, como coordinador di Minister Mike de Meza. E kier sa kico AVP su intencion tin p'e proximo eleccion. Mirando tur esey, el a aserca Mike Eman, unda a reuni den un bon ambiente, pero como e no por a keda contento, el a dicidi di retira for di AVP.

E no a drenta AVP pa trabao, pasobra trabao e tin como Polis, pero e kier a haci e diferencia pa su hendenan sigur esnan pariba di brug.

Pariba di brug mester di mas hende, cu ta haci e diferencia pa haci e cambio. Si e no por haci e diferencia of por haya un rol cu ta mas involvi den politica, anto e no lo subi ningun lista. E tin 23 aña trahando den husticia, y e sa con por ruim op de boel.

"Mi no ta bay ta keinta banki mas", tabata su palabranan. El a gradici Mike Eman di por a forma parti di AVP y a gradici tur esnan cu a sa di sostene e ultimo 4 añanan.

Por ultimo a gradici Minister Mike de Meza, pa a duna oportunidad di por a traha den su Ministerio. Riba e pregunta, ki direccion lo e bay, pasobra tin informacion cu e lo subi lista di POR. Segun Allan Howell, ta diferente partido a aserca su persona. Nan a mira su potencial y cualidadnan, pero e no kier menciona nan.

Su siguidorman kier p'e sigui, pasobra nan ta kere cu Howell por haci e diferencia, pa cual e ta hibando combersacion cu un partido. E no kier menciona cu ta partido POR, pero e rumornan ta fuerte y proximamente e lo keda anuncia.

Pa otro siman tur su hendenan lo sa ki direccion Allan Howell lo bay.